

POLÉMICA KOMBATE KORRUPSAUN IHA TIMOR-LESTE

Constantino de Jesus¹

Introdusaun

Iha sosiedade ne'ebé korrupsaun sai toman ida, kadavés ita imajina ita-nia an nu'udar Komisáriu Komisaun Anti-Korrupsaun, no pergunta dahuluk ne'ebé karik mosu iha ita-nia kakutak: saida mak ita hakarak halo hodi prevene no kombate korrupsaun? *Pena de morte*, prizaun rohan-laek no prizaun tinan-naruk ba korrúptór mak sai ita-nia resposta, dala-ruma. Maibé, resposta sira-ne'e bele prevene no kombate korrupsaun iha sosiedade ida? Hamta'uk korrúptór ida ho kastigu bele halakon korrupsaun?

Kestaun ne'ebé ita tenke rezolve mak oinsá ema halo buat di'ak la'ós tanba ta'uk ba kastigu, maibé tan ezijénsia umanidade, komún no universál. Importante liu iha kombate korrupsaun mak prevene duké kura. Ita tenke halakon kondisaun sira ne'ebé hamosu moras ida, la'ós hein de'it hodi kura. Maquiavel dehan katak di'ak liu halo prevensaun duké hein halo kurativu (Adverse, 2012: 31).

Kuaze fulan hirak nia laran, CAC sai polémika, la iha Komisáriu. Liuhusi rezolusaun N.º 18/2024, 26 fulan Juñu, Parlamentu Nasionál [PN] eleje Komisáriu CAC foun ba períodu 2024-2027. Eleisaun ba Komisáriu CAC sai debate entre partidu polítiku sira, entre bankada opozisaun no Governu iha PN. Tanba ne'e, Komisáriu CAC foun mosu hosi kontradisaun, la'ós konsensu nasionál. Tuir loloos, PN tenke sai fatin ba konsensu nasionál kona-ba interese públiku. Infelizmente la akontese, alterasaun kona-ba Lei Komisaun Anti-Korrupsaun no bankada opozisaun la partisipa iha debate nu'udar ezemplu ba ida-ne'e.

Ita konsidera katak prosesu hili Komisáriu CAC nu'udar parte ida hosi mekanizmu oinsá atu kombate korrupsaun iha Timor-Leste. Ita só bele rezolve korrupsaun bainhira iha sistema demokrasia ohin-loron, CAC iha lideransa ne'ebé kriticu, independente, imparsiál, progresivu no hali'is de'it ba interese povu nian. Hosi ne'e ita prezisa hakle'an kestaun sira ne'ebé ensaiu ne'e hakarak dezenvolve. Primeiru, independénsia CAC iha Timor-Leste. Segundu, dilema CAC ba prevene no kombate korrupsaun. Terseiru, alternativu ba prevene no kombate korrupsaun iha Timor-Leste.

CAC no Independénsia Institusionál

Tanba saida mak sosiedade prezisa instituisaun independente? Belek ka lae instituisaun ida sai independente? Saida mak sai kritériu atu instituisaun ida sai independente? Maizumenus, esforsu hodi hetan resposta ba hahusuk sira-ne'e mak bele lori ita ba kompriende CAC nia ezisténsia, nia funsaun no nia independénsia iha Timor-Leste.

Instituisaun ida sai independente tanba iha konfliktu interese. Luan liu, iha konfliktu entre universalidade no partikularidade; entre interese privadu no interese komún; entre ema ida nia interese partikulár ho interese komún iha funsaun públiku [Estadu] ne'ebé nia hala'o. Hosi

¹ Alumni Fakultade Direitu UNTL; tinan 25; N.º TLF 76155419; email: peremaman49@gmail.com.

kontradisaun ne'e, instituisaun independente ninia funsaun mak defende interese komún hosi interese privadu. CAC nia funsaun mak prevene no kombate korrupsaun, aktu ne'ebé hakonu de'it interese privadu. Korrupsaun nu'udar hahalok ida ne'ebé ema ka grupu ida utiliza nia pozisaun [podér públiku] hodi hakonu nia interese. Tipu sira hosi korrupsaun mak hanesan korrupsaun pasiva, korrupsaun ativa, pekulatu, abuzu podér, partisipasaun ekonómika, konfliktu interese, nst.

Timor-Leste iha órgaun soberania haat, Prezidente Repúblika, Parlamentu Nasionál, Governu no Judisiál. Iha ninia ezersísiu podér, instituisaun judisiária nu'udar órgaun soberania ne'ebé halo funsaun independente hodi kontrola no rezolve litíjiu sira. Enkuantu, CAC nu'udar instituisaun polisiál ne'ebé servisu hamutuk ho órgaun judisiária atu prevene no kombate korrupsaun. Ezersísiu podér polítika iha tendénsia atu asegura interese partikulár iha sociedade duké interese públiku. Nune'e, Estadu kria instituisaun independente atu servisu hodi defende interese komún no kontrola aktu ilísitu sira hanesan korrupsaun. Ezisténsia instituisaun independente mós nu'udar manifestasaun ba demokrasia representativa.

Administrativamente, instituisaun independente nu'udar organizmu hosi administrasaun indireta ne'ebé kria hosi Estadu atu realiza tarefa administrativa ne'ebé kompete ba nia, no Governu la iha kompeténsia atu kontrola, ka administrasaun independente la subordina ba ierarkia governasaun. Nune'e, administrasaun independente iha karaterístika hanesan: ninia lideransa hili hosi Parlamentu Nasionál; la subordina no la tuir instrusaun hosi ierarkia Governu; la subordina ba órgaun administrativu ruma; la iha responsabilidade krimínal ruma ba sira tan pozisaun no opiniaun ne'ebé sira foti iha sira-nia dezempeñu servisu; halo servisu públiku; no, nia rekomendasaun no paresér sira sempre vinkulativu (Oliveira & Dias, 2013: 77).

Instituisaun ida bele sai independente kuandu lideransa instituisaun ida independente dezde hosi hanoin, la sadere-an ba forsa polítika ida iha sociedade. Leál de'it ba interese komún povu nian no kumpri ba lei no orden ne'ebé regula instituisaun nia vizaun, misaun no nia asaun tomak. Lideransa iha instituisaun independente presiza konxiente katak instituisaun nia papél mak halo defeza ba povu nia interese. Porezemplu, CAC nia papél mak kombate korrupsaun hodi defende povu nia osan ne'ebé jere hosi makaer-podér sira. Nune'e, fudamentalmente, instituisaun independente sira nu'udar elementu progresivu iha Estadu nia laran.

Artigu 46.º hosi Dekretu-Lei N.º 16 /2021 de 15 de Setembro kona-ba *Bases Gerais da Organização da Administração Pública* prevee katak “*as pessoas coletivas que integram a Administração independente são criadas, nos termos da Constituição, para o exercício de funções administrativas que pela sua natureza exigam especiais garantias de independência*”. Artigu 48.º hosi deketu-lei ne'e realsa katak Estadu bele kria autoridade administrativu independente atu atribui servisu hodi responde ba nesesidade ne'ebé relevante iha sociedade, purezemplu CAC no PDHJ.

Lei N.º 8/2009, 15 fulan Jullu, Lei Kona-ba Komisaun Anti-Korrupsaun, nu'udar instrumentu jurídku ne'ebé hatuur CAC nia papél iha sociedade atu defende interese komún

hodi prevene no kombat korrupsaun. CAC eziste nu'udar entidade estatál ne'ebé independente atu halo kontrolu ba lala'ok administrasaun públika hodi garante no asegura governasaun di'ak. Tanba governasaun ida di'ak maka lala'ok administrasaun públika ne'ebé livre hosi korrupsaun. Nune'e, CAC eziste nu'udar instituisaun independente ne'ebé kategoriza iha administrasaun indireta Estadu nian. Independente katak la subordina ba estrutura ierárkiku órgaun ezeutivo nian no nia iha autonomia rasik atu halo servisu.

Artigu 2.º hosi Lei N.º 8/2009, 15 fulan Jullu, Lei kona-ba CAC, define CAC nia natureza nu'udar pesoa kolektiva públika ne'ebé iha personalidade jurídika, iha independéncia téknika, iha autonomia administrativa no finanseira. Aleinde ne'e, CAC nu'udar órgaun polísia kriminal especializada ne'ebé independente no halo funsaun tuir lei no faktu sira. Enkuantu, artigu 3.º no 4.º hosi lei ne'e atribui servisu rua ba CAC atu hala'o, prevensaun no investigasaun.

Papél CAC ba Prevensaun no Kombat Korrupsaun

Iha sékulu XVIII, hafoin absolutizmu naksobu, lejitimidade polítika ka podér la'ós hetan ona hosi espíritu transedentál ida. Maibé, lejitimidade polítika adkire liuhosi prosesu formál ida iha ne'ebé sidadaun sira lejitima autoridade ida liuhosi eleisaun atu halo servisu ba interese komún. Hosi ne'e mós hamosu mudansa kona-ba konseitu korrupsaun. Antes modernidade, sosiedade kompriende korrupsaun nu'udar aktu ne'ebé kontra morál no virtude iha sosiedade. Aktu korruptu mak ida-ne'ebé la kumpre morál no virtude komún. Ohin-loron, korrupsaun nu'udar hahalok ne'ebé indivíduu ka grupu ida utiliza podér ho forma arbitráriu ba hakonu sira-nia interese. Nune'e, sosiedade moderna kompriende korrupsaun hosi relasaun no dikotomia entre interese privadu [aktu arbitráriu] no interese públiku [podér], (Filgueiras, 2008: 25).

Korrupsaun katak sobrepozisaun interese privadu ba interese públiku. Iha tranzisaun hosi mundu antigu ba mundu modernu, relasaun entre interese no korrupsaun hetan modifikasaun. Sosiedade merkantíl sira muda konteúdu orijinál hosi liafuan interese, ninia konotasaun la'ós morál negatibu ida, maibé interese sai hanesan elementu sentrál hosi moralidade polítika moderna rasik. Interese la'ós ona sai hanesan vísiu morál no virtude ida, maibé valór polítiku fundamentál ida. Nune'e, interese iha kampu ekonomia liberál konverte ona sai konseitu polítiku ba lala'ok desizaun públika sira (Filgueiras, 2012: 133).

Filózofa Spinoza hateten katak korrupsaun mai hosi kualidade instituisaun polítika sira ne'ebé ladún di'ak, inkapás atu garante sidadaun sira-nia seguransa hodi husik ema privadu balun (*privatus*) apresenta-an ho direitu no kbiit atu uza lei sira ba asegura sira-nia interese rasik, no hamosu prejuizu ba povu. Korrupsaun la'ós atribui ba vísiu sira ukun-na'in no sidadaun sira-nian, maibé nu'udar kondisaun ba ezersísium podér (Chaui, 2012: 39).

Sistema demokrasia ohin-loron permite atu korrupsaun akontese ho meius oiain no kompleksu. Podér oligarkia halo korrupsaun oligárkikamente no podér demokrártiku halo korrupsaun demokrártikamente. Demokrasia nu'udar orden polítika ne'ebé korruptu liu, tanba meius oiain ne'ebé nia oferese, tranzasaun barak akontese entre ema privadu ho podér públiku sira no, normalmente, volume rekursu sira ne'ebé sei distribui liuhosi deliberasaun kolektiva.

Kompara ho orden absolutista no oligarkia sira, prinsipalmente demokrasia sai vulneravel liu iha kontestu ohin-loron (Santos, 2012: 106).

Demokrasia permite individuú ka grupu ida adkire podér liuhusi eleisaun, mekanizmu ida-ne'ebé sidadaun sira fó konfiansa ba ema-seluk atu representa sira iha Estadu hodi foti desizaun polítika. Estadu ne'ebé kompostu hosi Prezidénsia Repúblika, Parlamentu Nasionál, Governu no Órgaun Judisiária. Maski CAC eziste nu'udar instituisaun independente, maibé ninia lideransa hili hosi PN tuir proposta Governu nian. Ida-ne'e mak temi nu'udar interdependénsia iha ezersísio podér. Tuir Gomes Canotilho (Oliveira *et al*, 2015: 123), separasaun no interdependénsia podér ne'e iha dimensaun institusionál no funsionál. Institusionalmente, eziste órgaun soberania haat, no órgaun soberania sira-ne'e ezerse funsaun diferente. Iha funsaun ezeutivo, lejizlativu no judikativu.

Fundamentasaun teórica supra-aprezentada hatudu katak eziste interese iha ezersísio ba podér polítika ka podér públika iha sociedade. Ezersísio polítika ne'e iha tendénsia boot tebes atu individuú ka grupu ida bele utiliza podér ba interese privadu. Tanba podér nu'udar espasu korruptu, ka temi nu'udar korrupsaun demokrátika. Diferente ho ukun absolutista no oligarkia, demokrasia fornese espasu luan ba ema barak atu envolve iha ezersísio podér, nune'e iha tendénsia atu hamosu korrupsaun. Tanba iha sorin-ida, aumentu oportunidade sira ba tranzasaun ilejítimu entre públika ho privadu no, iha sorin-seluk, auzénsia hosi restrisaun ka kontrolu ba oinsá podér públika bele ezerse (Santos, 2012: 107).

Nu'udar administrasaun indireta no independente, PN maka hili Komisáriu CAC. Prosesu nomeasaun ba lideransa CAC ne'e sempre tama eínkoflitu, entre bankada Governu no opozisaun iha PN. Tanbasá? Fenómena ne'ebé akontese reiteradamente ne'e justifika oinsá interese públika subordina ba interese privadu. PN, liuhusi bankada governu, utiliza podér polítika hodi halo aletrasaun daruak ba Lei CAC. Liuhusi Lei N.º 1/2024, 8 fulan Maiu, PN halo alterasaun ba artigu rua ne'ebé nu'udar esénsia hosi servisu CAC nian. Altera atu Komisáriu CAC bele eleje ho maioria absoluta de'it hosi deputadu sira, no la presiza ona partisipasaun $\frac{3}{4}$ hosi deputadu sira-nian. Sorin-seluk, altera mós atu PN bele deside hodi ezonera Komisáriu CAC iha kualkér momentu kuandu nia la kumpre nia devér².

Desizaun ba alterasaun normativa ida-ne'e nu'udar iniciativa partiál hosi forsa polítika ida, bankada governu iha PN. Nune'e, hatudu momoos katak alterasaun ba lei ne'e mosu hosi konflitu interese ho objetivu atu hakonu de'it mós interese privadu iha ezersísio podér. Sorin-seluk, alterasaun ne'e bele fasilita PN, nu'udar fatin ba kontestasaun interese privadu, atu kontrola makaas servisu CAC nian, ka lian-seluk, bele hili, orienta no ezonera Komisáriu CAC tuir nia gostu. Satán Komisáriu CAC ne'ebé nu'udar mós membru ativu partidu polítiku ne'ebé hetan asentu parlamentár no hala'o hela governasaun (JSMP, 2024).

² Lei N.º 1/2024, 8 fulan Maiu 2024, Alterasaun daruak ba Lei Komisaun Anti-Korrupsaun, altera artigu 7.º N.º 1 katak “*O Comissário é designado pelo Parlamento Nacional, sob proposta do Governo, por maioria absoluta dos Deputados, e toma posse perante o Presidente do Parlamento Nacional*”. No altera mós artigu 11.º N.º 2 al. g) katak “*Pela exoneração, aprovada por maioria absoluta dos Deputados, sob proposta fundamentada do Governo, em caso de violação dos deveres do Comissário decorrentes da lei*”.

Prevensaun no Kombate Progresivu ba Korrupsaun iha Timor-Leste

Prevene no kombate signifika asegura ka defende interese públiku. Tanba korrupsaun bele define mós nu'udar aktu violasaun ba interese públiku, ne'ebé implika apropriasaun ilejítimu ba rekursu, bens, patrimóniu ka servisu públiku hosi indivíduu ka grupu ida (Guimarães, 2012: 47). Korrupsaun akontese iha espasu públiku [Estadu], maibé, dala-ruma Estadu rasik inkapás atu rezolve. Ita hanesan moris iha sírkulu visiozu nia laran, akontesimentu infinitu entre korrupsaun no inkapasidade estatál atu fó solusaun. Nune'e, atu prevene no kombate aktu violasaun ba interese públiku refere maka Filgueiras propoin solusaun fundamentál tolu: tenke iha instituisaun ne'ebé bele kontrola, ka prevene no kombate korrupsaun iha ezersísiu podér públika; tenke kria konxiénsia kona-ba espíritu no virtude públiku; tenke iha lei ne'ebé forte hodi kontrola ezersísiu podér ne'ebé arbitráriu (Filgueiras, 2008: 77).

Dahuluk, ezisténsia instituisaun sira bele halo kontrolu ba ezersísiu podér hodi prevene no kombate korrupsaun. CAC nia ezisténsia bele halo kontrolu liuhusi *accountability* orizontál [*checks and balances*], iha ne'ebé tenke halo investigasaun no prevensaun ba krime korrupsaun iha instituisaun sira. Seluk, kontrolu bele halo liuhusi *accountability* vertikal, iha ne'ebé sidadaun sira bele halo keixa hasoru maka'er-ukun sira kuandu sira pratika korrupsaun (Anastasia & Santana, 2012: 310). CAC bele halo servisu tuir nia kompeténsia ne'ebé prevee ona iha artigu 5.º hosi Lei N.º 8/2009, 15 fulan Jullu, Lei CAC. Iha sorin-seluk, artigu 27.º no 151.º hosi Konstituisaun RDTL mós garante Provedoria *Direitos Humanos* no Justisa [PDHJ] atu apresia sidadaun sira-nia keixa hasoru podér públika, no bele halo verifikasaun kona-ba desizaun polítika nia inkonstitusionalidade. Konkretu liu, Lei N.º 7/2004, 26 fulan Maiu, *Estatutos do Provedor dos Direitos Humanos e de Justiça*, regula kona-ba PDHJ nia kompeténsia sira perante sidadaun no podér públiku.

Kontrolu ida-ne'e nu'udar esénsia no manifestasaun hosi demokrasia representativa atu asegura hodi makaer-ukun sira bele hakonu povu nia interese. Polítikamente, instituisaun sira-ne'e nu'udar mekanizmu partisipasaun polítika atu sidadaun sira bele hato'o keixa, ba CAC no PDHJ, eínkoordenasaun ho Ministériu Públiku, kona-ba desizaun polítika ruma ne'ebé viola interese públiku no *direitos humanos*. Legalmente, instituisaun sira-ne'e bele kontrola ezersísiu podér públika atu nafatin eínkonformidade ho norma sira ne'ebé eziste iha sosiedade hodi garante boa-governasaun (Peruzzotti, 2012: 403). Kontrolu institusionál mós bele hala'o liuhusi Mídia/Imprensa (De Lima, 2012: 442), Sistema Judisiáriu (Filho, 2012: 448), *Tribunál de Contas* (Speck, 2012: 461) Komisaun Parlamentár Inkéritu (Filgueiras, 2012: 468), Auditoria Esterna (Gomes & Araujo, 2012: 473), Auditoria Interna (Spinelli, 2012: 482) no Organizasaun Sosiedade Sivil.

Daruak, presiza hasa'e konxiénsia públika nian kona-ba espíritu atu asegura interese komún iha administrasaun públika. Konxiénsia kona-ba kombate korrupsaun tenke mosu iha fatin hotu-hotu, hosi sidadaun baibain, funsionáriu públiku, lideransa instituisaun independente no makaer-ukun sira. Kombate korrupsaun tenke sai luta koletiva. Iha buat tolu ne'ebé presiza halo iha kampaña públika kona-ba prevene no kombate korrupsaun: primeiru, Komisáriu CAC ka instituisaun sira-seluk tenke independente, krítiku, progresivu no iha

background multidisiplináriu, la'os de'it jurista. Relativamente ba CAC, nesesito tebes mekanizmu adekuaudu ne'ebé livre hosi konfliktu interese polítiku kona-ba nomeasaun no ezonerasaun ba Komisáriu CAC, atu CAC labele ta'uk no mo'ut ba konfliktu interese [dilema] iha prevensaun no kombate korrupsaun; segundu, tenke iha formasaun ba funsionáriu públiku sira kona-ba “Lei Prosedimentu Administrativu” atu sira hatene no bele defende sira-nia direitu ne'ebé viola iha administrasaun públika. Presiza nune'e, tanba sidadaun ka funsionáriu barak dala-ruma lakohi hato'o keixa ba krime korrupsaun tanba amesadu hosi relasaun poder ne'ebé sólidu iha administrasaun públiku; terseiru, presiza hasa'e públiku, ka povu nia konxiénsia atu ativamente hato'o kritical ba poder públiku, evita paternalizasaun ba ukun-na'in sira hodi bele hato'o kritical no asegura interese komún. Ida-ne'e mak nu'udar meus progresivu atu prevene no kombate korrupsaun iha Timor-Leste.

Datoluk, presiza iha lei ne'ebé forte hodi prevene no kombate korrupsaun. Lei N.º 7/2020, 26 fulan Agostu, kona-ba *Medidas de Prevenção e Combate à Corrupção* nu'udar dokumentu jurídiku ne'ebé Estadu aprova atu sai hanesan CAC nia arma hodi kombate korrupsaun. Artigu 1.º, N.º 1 hosi lei ne'e prevee katak “*a presente lei dispõe sobre medidas gerais de prevenção, sobre o regime de declaração de rendimentos, bens e interesses, define os crimes de corrupção, as penas que lhes são aplicáveis e os meios especiais de obtenção e conservação de prova*”. Dokumentu jurídiku ne'e gia CAC nia servisu ba kontrola ezersísu poder públiku, define krime no kastigu sira kona-ba korrupsaun, no define mekanizmu partisipasaun sosiedade nian ba prevene no kombate korrupsaun. Maibé, lei ne'e bele aplika ho di'ak bainhira CAC puramente eziste nu'udar instituisaun independente no progresivu ida.

Konkluzau

Korrupsaun nu'udar aktu kriminal ida-ne'ebé indíviduu ka grupu ida utiliza poder públiku hodi hakonu nia interese privadu. Típicamente, eziste korrupsaun pasiva, korrupsaun ativa, pekulatu, abuzu poder, partisipasaun ekonómika, konfliktu interese, nst. Nune'e, CAC nu'udar instituisaun independente ne'ebé halo servisu hodi kontrola ezersísu poder públika no defende interese komún povu nian, aliás asegura osan povu nian. Ida-ne'e mak CAC nia papél ba prevensaun no kombate korrupsaun iha Timor-Leste. Aleinde ne'e, CAC mós nu'udar instituisaun ne'ebé sidadaun sira bele hato'o keixa kona-ba krime korrupsaun, conforme Lei CAC no Lei kona-ba *Medidas de Prevenção e Combate Corrupção*.

Iha realidade, CAC sai polémika. Tanba nomeasaun ba Komisáriu CAC nunca sai konsensu nasional iha PN, sempre tama iha konfliktu interese entre forsa política sira. Konsekuentemente, CAC sai kontroladu liu no possibilidade lakon nia imparcialidade iha prevensaun no kombate korrupsaun. Nune'e, justifika katak poder sempre iha tendénsia sai korruptu, iha ne'ebé makaer-ukun sira bele asegura de'it sira-nia interese privadu duké interese públiku.

Atu kombate duni korrupsaun iha Timor-Leste maka ita presiza instituisaun ne'ebé independente hodi halo kontrolu ba poder públiku, no sai fatin atu sidadaun sira bele hato'o keixa ho livre. Iha sistema demokrasia ohin-loron, presiza hasa'e mós konxiénsia ema-hotu nian, liuliu sidadaun sira-nian atu sai kritical hodi prevene no kombate korrupsaun. Ikusliu,

tenke hametin mós baze legál sira ba kombate korrupsaun, no nesesáriu tebes atu altera lei sira ne'ebé halo CAC lakon nia independénsia.

Referénsia sira:

- Avritzer, L., Bignotto, N., Guimarães, J., & Starling, H. M. (2012). *Corrupção: Ensaio e Críticas* (2 ed.). Belo Horizonte: Editora UFMG.
- Filgueiras, F. (2008). *Corrupção, Democracia e Legitimidade*. Belo Horizonte: Editora UFMG.
- Oliveira, B. N., Gomes, C. d., & Santos, R. P. (2015). *Os Direitos Fundamentais em Timor Leste: Teoria e Prática* (1 ed.). Coimbra: Ius Gentium Conimbricæ.
- Oliveira, F. P., & Dias, J. E. (2013). *Noções Fundamentais do Direito Administrativo* (3 ed.). Coimbra: ALMEDINA.
- Constituição da República Democrática de Timor-Leste - RDTL. (2002).
- Dekretu-Lei N.º 16 /2021 de 15 de Setembro, Bases Gerais da Organização da Administração.
- Lei N.º 8/2009, 15 fulan Jullu, Lei Kona-ba Komisaun Anti-Korrupsaun [CAC, sigla português].
- Liuhusi Lei N.º 1/2024, 8 fulan Maiu, Segunda alteração à Lei n.º 8/2009, de 15 de julho, Lei sobre a Comissão Anti-Corrupção.
- Rezolutaun Parlamentu Nasionál N.º 18/2024, 26 fulan Juñu, *Designação Pelo Parlamento Nacional do Comissário da Comissão Anti-Corrupção*.
- Lei N.º 7/2004, 26 fulan Maiu, *Estatutos do Provedor dos Direitos Humanos e de Justiça*.
- Komunikadu Imprensa no Observasaun JSMP ba Nomeasaun Komisáriu CAC: https://www.google.com/url?sa=t&rct=j&q=&esrc=s&source=web&cd=&ved=2ahUKEwi_t_e_Qy8GJAxVU4zgGHTqJNdoQFnoECBsQAQ&url=https%3A%2F%2Fjsmp.tl%2Fwp-content%2Fuploads%2FKAK-final-pr-nomeasaun-20-6-2024-2-1.pdf&usg=AOvVaw3MLOKlkwQEY2XU2LYk-rb&opi=89978449